

白雲祖師初學記序鶴在八幡宮
初學記者白雲祖師清覺之所
作也覺公以先聖之後為瞿曇之
學文字語言所以開羣迷引後
進發揚三乘十地之要使之入佛

知見惟恐人不為佛其心切如此
夫人生而靜天之性也惑於物而動
性之情也生而靜故各具此靈明
知覺之妙感而動故皆有障蔽
流蕩之失釋氏有受之祛其障
蔽返其流蕩或勸或誘或怖或
證使歸於一乘而六道眾生波
旬外道其趣不一佛以正道扶持
救護子徑萬偈不憚於煩者
良以此也夫玉不琢不成器人不學
不知道白雲祖師敷揚演說以直
一切俾由初地以至十地直與如來
等正妙覺其其佛心何以異哉
白雲宗主明仁奉以奏
御

聖上乙覽之餘命錄入大藏以傳
久遠是亦如來開悟羣生之仁也
孟頫豈勝歡喜讚歎之至謹叙
于卷首之皇慶二年三月七日集賢
侍講學士中奉大夫趙孟頫序

初學記

記者經論之流類也佛滅度後三乘聖賢
或記已往之事跡或說未來之報應或叙
當世之化源或採摭經法直明佛意撰集
文籍隨作者意以立其名大小乘三載後
聖賢撰集是也但西域多名經論東夏多

名記集其實一也今名記者即彼論也又
復記即錄也順理善法可記錄故記錄三
乘十地之法以示初心令其習學又記即
答也初心好學者請問起行造修之法故
作此答而云論者循環研覈義理分明令
初心者易於習學而言學者效也效習不
已自有有所見有所見者即名為覺既覺悟
已務於起行行必到家名究竟覺覺即佛
也然必在於初心故名初學亦示不輕之
意也文云千里一步為初斯良證也

西京寶應寺沙門釋 清覺述

此是記主之銜位也總別三重一西京是
總寶應寺是別西京非止一寺故二寶應
寺是總沙門釋是別寺容四眾人故三沙
門釋是總祖師尊諱是別釋子非一故述
字通於能所祖師是能述記文是所述也
西京是四京之一地名洛陽即周公之所
營者後漢建都于此漢以火德王天下改

曰維陽有唐仍舊號令屬河南府寶應寺
依龍門山住山在洛陽之西今不言山名
而舉地名者西京是大都之稱餘杭亦有
龍門山故寶應寺即記主受經之處記主
於熙寧二年禮海慧大師出家受具後海
慧說偈勸發游方元祐八年掛錫于古杭

靈隱寺僧俗問法者紛紛而來住持懶菴
童和尚請師駐錫於寺後白雲菴焉師初
誕日有白雲滿室因以白雲自稱菴之
名默與心契從而居焉由是白雲之名流
芳益著且白為衆色之本潔淨無瑕之謂
雲者應用而來來無所從用謝而去去無

所至而能含潤法雨益濟萬物重重無盡
有雲像焉廣說法喻如華嚴經聖人無名
為物立稱警頌人天良有以也沙門是出
家之通號釋字是本師之姓氏紹隆繼踵
宜其具稱上清下覺記主尊諱也字本然
號白雲姓孔氏即至聖文宣王五十二世
孫也其宗人孔宣義有真讚可考進士孔
瑛集宋朝朝士與諸禪講讚文數十篇刊
行於世其餘始末具在本傳述而不作謙
之至也

南山大普寧寺嗣孫 道安注

佛道不可不學生死不可不憂
此二句是一部之總意也記主乘願力以
出興為衆生而製作所以開宗立教者意
在於此佛道華梵影畧約揀為言可以離
貧窮受富貴度生死越苦輪雖有正助權
實之不同皆名佛道故淨名經中說佛道
品對治疑執人天界中不可不學不學則
貧窮無福慧入生死險道矣故次句云生
死不可不憂也生死事大無常迅速豈可
安然坐待酸痛學道之士常將此二字貼
在鼻尖上作箇對治法門古人用心如此
其急令人豈可不憂也
區區枉過浮生智慧翻成愚拙

此明不學之過也有智之人為智所使祇陪人事管理世緣但於名利留心何暇參尋佛道或復高推聖境世智辯聰不特虛度光陰翻更沉淪苦趣可謂愚拙之甚矣莫怪學道不成時人盡投邪窟

問學佛法者不為不多少得成功者所謂勤修苦行非涅槃因豈非學道者在費工夫耶故作此答由不得其正途所以不成其道

欲得不遭欺誑莫離十地三乘

十地三乘階降次第如人還家明識道路則不為人牽引欺誑矣然十地三乘經論

互出華嚴所說十地唯是一乘大品所說十地通攝三乘同性經中三乘之人各有十地所謂聲聞十地緣覺十地菩薩十地各有其名菩薩十地名同華嚴義則有異今文十地參用華嚴之名橫攝大品之義籠絡諸經自成一家意在通而不局也言

三乘者亦有多種一者一乘三乘小乘名為三乘二者大乘中乘小乘名為三乘此即菩薩緣覺聲聞也此中自有三義一則融一乘同大乘合二乘同小乘故唯三也二則大乘中自有三乘如入大乘論說三則小乘中亦有三乘如小論中自有聲聞法緣覺法及佛法問既有佛法何名小乘答此中佛法但慈悲愛行異於二乘耳今文三乘當於何種一中當其第二二中全用三說雖約機約法約喻不同並通諸文而不局定意在勸發行人造修出界而不局於文字教限也

若是不依正法恰如登樹捉魚又似井中摸月

十地三乘是其正法捨此別修如緣木求魚猶猴救月此喻不修之人也正法云何如下文說

頓教妙覺佛乘十地稱呼菩薩五果緣覺辟

支四果六通羅漢三果二果一果諸漏未有神通般若悟心見性名目稱呼內凡

此示十地三乘之位也自第六速行地至第九法雲地是菩薩乘次第前五果是緣覺乘四果阿羅漢是聲聞乘三二一三進未能至聲聞退不可居凡位故云諸漏未

有神通當是聲聞乘向見修二位也般若悟心見性名目稱呼內凡者聲聞有二位初九二聖九位又二外九內凡凡自分為三初五停心二別相念三總相念此三俱屬外凡亦名資糧位人天二乘創心入道修此三門對治凡習內凡有四謂暖頂

忍世第一此四亦名加行位又名四善根二凡共七通名七方便位文云般若悟心見性者人天外凡於三法中淘練已又悟般若心見真如性策勤加行趣於聖果即入見道位也其次聖位亦分為三一見道當於初果二修道當於第二第三三無學道當於第四聲聞乘位方究竟也問文云十地稱呼菩薩今此何云六至九耶答第九法雲地即他經中第十地名今云十地猶約他經說也問頓教妙覺佛乘應不在十地三乘之數耶答此位正是所修之果三乘十地是能修之因由歷三乘十地次

第漸修因行已圓頓證妙覺故此特云頓教由漸入頓即漸修頓悟之衡量也問既云由漸入頓只合自小之大先說一果二果次第至於佛乘文中何得倒置耶答此順佛經從本起末要令學者返本還源故云於一佛乘分別說三

若修果位不成總是著空者有

證宗論云悟道不證果者名為著空病講經不證果者名為著有病天下三乘教藏堆積如山並不見箇三乘道人者何皆因著空者有病也問佛法以空有為門令人修造弘傳之者或毀空讚有或破有讚空或云空淺有深或云空深有淺各憑經論成熟機緣除此二門別無可托今皆目之為病莫不與經論相違麼答經論所談歸於中道執著一處即是病源是故目之為著空者有病也

要知經藏根源余今為君解說非是貧道多言初學要知子細

問修行之人既悟無常迅速便當火急修行然未看經遇緣即宗安知不落空有二病耶答要知經藏根源余今為君解說記主可為慈悲深厚無問自諶者也古人曰不請而教孰云不欺既無請者何必多言

答初學要知子細言貧道者佛法初來僧人皆名道士自稱貧道今循古說也

猶如明鏡當前照見古今邪正

喻明可見然喻中具法鏡但照見妍醜短長今曰古今邪正乃約法說

塵沙諸佛出來此事終無移改

塵沙即恒沙也尋念過去佛亦應說三乘
佛佛道同誰敢移改

學道先求因地果位直是修行若非果滿功
圓雖是口快舌端決定非干正法

前三句修行實效後二句徒事虛文又初
二句因地覺心要與果位名目相應後三

句皆是返顯之辭也

初學先求因地

因地二字法喻立名地能生成荷載若無
種子則無所生修行之人莫不以發心為
因發大乘心得大乘果發小乘心得小乘
果未有發小心而得大果者是故經云因

地不直果招紆曲記主深恐初學之機洗
心非正故此特云初學先求因地而言學
者猶飾也器不飾則無以為美觀人不學
則無以有懿德若夫為學日益為道日損
損之則道業踰高益之則學功踰遠故形
將俗人而永隔心與世情而懸反矣

初從戒定慧修須知名目般數

上句揔標下句生起下文之意題云初學
即以此三法為篇首者當知此三皆名學
也初修學人必以此三法為因地者為對
世間舊邪三學立正三學以對治之亦示
翻邪歸正之意也戒以防非止惡定即息
慮靜緣慧乃破惑證真此三法門俱當修
學修學之門依其次第故經云依因此戒
得生諸禪定及滅苦智慧所以爾者身口
所發事在戒防三毒勃興要由心起今則
先以戒捉次以定縛後以慧殺理次然矣
然此三法正是經律論三藏所詮之義通

名學者諸佛菩薩本意欲令人學戒學定
學慧故以經律論三藏三教而證示之故

云三學非為學於文字言教而已故大小
乘諸教中皆云增上戒學增上定學增上
慧學不言增上經學律學等標題云初學

先求因地即繼之戒定慧修良有以也名
目般數如下文說

五分戒香熏體一言萬部都收小乘因名四
諦辟支十二因緣菩薩須行六度佛乘十力
安排

五分者即戒定慧解脫解脫知見也轉五
蘊內身為五分法身分世出世間之異今

五分香皆稱戒者以戒為初由戒生故
戒之一字無所不包故下句云一言萬部
都收雖云一言通目應機不同故下文云

小乘因名四諦等然此諦緣度力由三乘
及佛得名不同其實皆從戒中生起

連磨胎息禪定千里一步為初到此歡喜地
成立作內凡基址

初句正明定體次句明其要義後二句功
成得名且言胎息者約喻立名喻如有情

初入胎時但有一息持其肉塊漸至長大
成形出胎是時未辨好惡修禪定者持心

一處若存若亡一切善惡都不思量直至
功成不離最初一念故下文云千里一步

為初到此歡喜地成者此地本是菩薩十
地中之初名華嚴瓔珞皆同此名乃在往

行向三賢之後言內凡者或指三賢為內
九十信為外凡既曰歡喜地成何故又曰

內凡耶答今此是三乘十地不與華嚴瓔
珞是同名為歡喜者在九夫位中方將發

心慕樂入道故得歡喜之名如經云若有
眾生深種善根善修諸行乃至發如是心

即得超凡夫位住歡喜地成就多歡喜多
淨信等尚未向於初果何況菩薩地之初
位耶言內凡者如小乘四位中初方便位

分二一外凡五停心觀等二內凡四加行
位等從四加行方入初果謂之見道位即
下指見道沙門是也

四諦苦集滅道真如般若依持聲色同含實
相經云見道沙門

問前以諦緣度等分配三乘今何只舉四
諦法耶答證宗論云起首修行是四諦法

當知四諦是初修行人入頭處也其次十
二因緣六度萬行名目雖殊亦不出此四

諦之法真如般若依持聲色同含實相者
修行之人深觀四諦功成見道之相經云

見道沙門者前云內凡是方便位今此正
當見道位下去是修道位於道有所見故

方曰真修即是先悟後修之意小乘經論
皆如此說

既知登地已去初禪四果漸生華嚴法界理
事真如一體三身分開法性法相合成佛性

佛心勿論有情無情攝屬圓覺妙用

初句躡跡上文次句依正二報如下文說
初果得初禪二果得二禪等今云初禪四

果者舉初後以攝中間也既有漸之一字
次第漸入漸證至於極果皆由四諦而起

也華嚴法界理事者華嚴四法界不出理
事二門三身一體性相合論情與非情皆

同妙用並是功成證極之相也
道士別號虛無神仙謂之元氣造化虎龍交
遊乾坤離女坎男急急修性養神進火先須
煉已

虛無元氣同出而異名虎龍交遊道家者
流固形求命之術也世傳天師於龍虎山

求白日上昇之法燒丹煉藥水火呪術其
源出於彼山石洞之中雖云玄妙未免輪
迴若不進修終從敗壞

孔子太極太素孟子養浩為真莊子參寥冥
默老子萬物歸根更有多般名目理實無形
無名

周易鉤命訣云天地未分之前謂之一氣
於中轉有五運謂太易太初太始太素太
極今言太極太素不約次第起舉二名也
雖非孔子之言乃宗孔子之教也孟子曰
我善養吾浩然之氣冥塞乎天地之間參
寥出於莊子冥默乃記家述其道也老子

云萬物芸芸各歸其根理實並是假名本
無形狀也

大道須排十地均攤乃作三乘釋道儒分三
教經書山海無窮若能收屬道德徒勞萬戶
千門文字屈指數沙統屬三乘十地

以佛教會通儒道二教也所以會者儒資
戒律道助禪那門戶不同其致是一亦示
海攝百川全收之義也初二句總舉其本
次二句派總為別次二句以本奪末後二
句攝末歸本

第一須陀洹果
十地三乘是誰建立有二義前九位是漸

教二乘眾生業行建立佛菩薩等依而住
持第十位是顯教大乘佛及菩薩願行建
立有情眾生依而住持問下文多依法華
所立法華宗於會三歸一今但說三乘不
言一乘何耶答頓教大乘即一乘也會前
三乘歸一佛乘故經云初以三乘引導眾
生然後但以大乘而度脫之今文但云大
乘不言一乘者一則為順經文二則所宗
三乘故問此頓教大乘即一乘者為在十
地之外為在十地之內若爾何失二俱有
過若云十地之內者既云三乘十地安得
三乘之外又有一乘耶若云十地之外者

既云三乘十地如何又出十地之外耶答
據今現文即在十地之內雖云一佛乘即
是會三所歸之一亦是對三顯一也若據
證宗論說妙覺大乘當第十一位三乘十
地總會歸于頓教大乘即是會漸歸頓之
意也記主二文不同二俱有理第一須陀

洹果者即聲聞乘中第一果也此當菩薩
十地中第二離垢地向下二果是其第三
地三果是其第四地四果是其第五地五
果辟支是其第六地第六入菩薩乘是其
第七地第七是其第八地第八是其第九
地第九是其第十地第十立名妙覺地則
在菩薩十地之外有何所以跨越初歡喜
地却以二地為初乃至十地為九却以妙
覺攝成十數耶答自有深意初歡喜地是
見道位是出世之初基菩薩依此修於三
學三學之內戒取在初二離垢地正表持
戒因地既云初從戒定慧修所以取戒度

為初位也又况初歡喜地表於布施布施
非出家人所尚出家當以戒行為先問大
品中說乾慧十地第九菩薩地十名佛地
謂之三乘共十地法何不用此却將菩薩
十地增減立名耶有此例否答金剛十八
住中第十七證道住配歡喜地第十八上
求佛地中國土淨具足方以第二離垢為
第一乃至以法雲為第九等覺地為第十
與此例同又菩薩十地攝佛因位一乘三
乘聲聞人天等並在其中故得引用聖師
立教據自所證而說不可拘其出處也
進修一果一向證得一分報身一重身先出
現一分塵垢去除

言果向者果乃酬於趣向之因向者向於
果故合先向而後果今不爾者意在果故
修證果向蓋不同時皆以苦集滅道而為
進修之本如俱舍說證得一分報身者由
是漸次十位滿後稱為圓滿報身故除陀
儻中禮清淨海眾總名滿分二嚴身者即
是從一至九皆名為分直至第十方得稱
滿運心普禮故云清淨大海眾也一重身
光出現重字宜作上聲呼即不輕之謂若
作平聲義者一重兩重以表重重之義如
云一燈二燈至百千燈不妨後後益明也
一分塵垢去除即是第二離垢地名也到
此位矣法爾自知破戒有罪故性不殺盜
等性本自然不由人教故云離垢即離破
戒之垢也
便超欲界六天已得初禪小果
六欲天者一四天王天二忉利天三夜摩

天四兜率天五化樂天六他化自在天此之六天未離欲心故名欲界今須陀洹已預聖人流類已絕欲心故云超越初禪小果初禪非小果小果得於初禪初禪有三天一梵眾二梵輔三大梵言初禪者禪有四界此當第一故名初禪梵語禪那此云靜慮靜即定也定能發慧故經云不假禪那無有智慧以此三天為初果人報身受用之土也

世間名利不求煩惱客塵不染終日背塵合覺經中立作預流已預聖人流類諸漏未得盡除更須七返人天漸入有餘涅槃

初三句對前顯勝後三句對後彰劣中二句正立果名既入聖流蠅利蠅名終不介意一切眾生不成聖果者皆由客塵煩惱所誤今不染著則自然背塵合覺矣梵語須陀洹此云預流預者入也流者類也已預聖人流類故言諸漏者諸言不一要畧有三謂欲漏有漏無明漏漏者煩惱現行令心連注流散不絕名之為漏如漏器漏舍深可厭惡損汚處廣毀責過失立以漏名既未盡除則人天未免言七返者七來人中七生天上如七步蛇所螫毒力定故前三果皆名有餘涅槃故云漸入

恐為小器易盈勿向人前誇道誓求無上菩提早達漏盡那含便是生死彼岸

初二句誠其自伐後三句勸其進修死時吉祥好相直展一指示人其屍不臭不壞從來表法如然得意生身此是道應速邁增深精進兼修助道

吉祥好相不受病纏坐脫立亡之謂也一指示人表得一果也二果展二指三果展三指例此知之其屍不臭不壞表得初果故故云從來表法如然意生身有三種一三昧樂正受意生身勢力任意故二覺法自性性意生身隨理自在如意現生故三種類俱生無作行意生身即事無相隨機赴意自在故上皆望後佛為生死望前不足名意生身今此義當第一種也迤邐次第漸進之義助道有二義通途言之除此三乘十地為正道外皆是助道如日用六事法等二則寂後頓教妙覺佛乘是其正道從初至九皆助道前義為優何者文云精進兼修助道意云精進之人除此三乘十地之外兼修百行皆為助道如壽禪師一日行百八件方便等也

第二斯陀含果
斯陀含是梵語此云住薄地亦名一往來且言住薄地者謂此二果聖人已斷欲界六品修惑煩惱漸薄故名住薄地又名一往來如本位說

進修二果二向證得二分報身兩重身光出現便與發光相對

初三句例上可知言發光者即是菩薩十地中第三地也

惟是自覺自知切莫誇逞外人
果位聖人權現凡身與其同事者意在攝生終不自言我真菩薩等乃自覺自知之謂也

已超梵眾梵輔便生色界二禪此位諸漏未

盡凡夫習氣未除更須一往一來或生欲界天上梵語斯陀含果此云更一往來

初二句對前顯勝次二句對後彰劣後四句正釋本名色界二禪自有三天一少光天二無量光天三徧淨光以此三天為報身受用之土不揀聖凡皆有習氣雖證果聖人亦所不免但有厚薄之殊故今特以九夫二字揀之也或者不定之辭不定生於欲界天中或生人間故也更一往來證成上義

切要安身寂靜勿令俗事牽精進波羅日用早令金鑽分離已見無生無滅又知無我無人正好著力修行報答四恩三有堪消施主供養已成無相福田不獨人間慶賀更兼神鬼欽崇

初四句立志金鑽舉喻佛性真金煩惱鑽穢早使分離佛性顯時煩惱滅也次四句成功無生滅證真常無我人明佛性四恩有二義三有從畧說後四句銷供道業既成堪可銷受人間供養也福田二字喻說堪為人間種福之田言無相者不作有為因果之想即達三輪體空之意也人間慶賀者可謂一人得道萬口稱賢

第三阿那含果

梵語阿那含此云不還亦云不來亦云出欲淤泥出欲淤泥者謂欲界煩惱二性繁雜如淤泥不殊今此聖者已永離故名為出也不還之義如下文明然此那含三界通說有其七種別辨成三欲界一種色界五種無色界一於四果中第三果人行相

最廣者以是有學位終故

進修三果三向證得三分報身三重身光出現位同煇慧一般

初三句例前第三果人位次即與菩薩十地中第四煇慧地是同也

已出初禪二禪又見三禪境界此位諸漏已盡生死永不沉淪梵語阿那含果此云更不往還蟬蛻便歸寂滅跳出煩惱火坑一者壽等太虛二者極樂無憂三者不負檀越四者不枉出家

初二句所依土三禪三天一少淨二無量淨三徧淨以此三天為此位聖人報身受用之土次十句對前顯勝初二句直明次二句翻梵次二句喻顯後四句成功

汝是教門祥瑞令人稽首歸依未成無上菩提早是人間希罕願君努力修行六通羅漢在近

初二句稱讚次四句勸進

第四阿羅漢果

阿羅漢是梵語或言無翻名舍三義故一曰不生亦曰無生二曰殺賊三曰應供舍此三義故存梵名也

進修四果四向證得四分報身四重身光出現正是漏盡聲聞

初三句例前後一句證果前位已云諸漏已盡今云正是漏盡聲聞豈不重繁前約勝進說今是自分說漏亦多種今方俱盡即諸漏已盡等也

梵語阿羅漢果此云應受供養便有三明六通草畧為君解說一者聲明不惑二者色明

眼辨三者思明無疑更有六通作證天眼通而無碍天耳通徹遠聞他心通彼意念宿命通記前生漏盡通達無我變化通得自由

初二句翻梵成唐應受供養應字平呼有三義一應永害煩惱賊二應受人天廣大供養三應不受後有今惟一義人所熟聞

故第二位云堪銷施主供養今云應受供養優劣非無前以功業堪銷今則正當職分前但人間今兼天矣次十二句具說三

明六通初二句總標言三明者一宿命明二天眼明三漏盡明知三世故說此三宿命命知過去天眼知未來漏盡知現在即

六通中之三也餘三不得稱明者餘三劣故身通但是工巧天耳但聞聲他心緣他別想是故餘三但得名通此如婆沙中說

次三句三明却與適說不同第一聲明乃在五明之初第二色明義同天眼第三思

明義當漏盡然且強配記主必別有據也後七句說六通於中初句總標其次六句

句各一通目連尊者始得六通即是此也通之與明經論皆異並如智論第三廣說

恐煩不引

真是漸教小乘理合一身自度譬如馬羊拽車獨自牽出火宅

初二句誠勸次二句喻明羊也非是駕車之器以表此位道力卑薄未達大乘深妙

不堪為人法師且可自度而已

報屬十三梵天稱呼六通羅漢

初句所依土比前位之上更增加四禪四天為報身受用之土言四天者一福生二

福愛三廣果四無想次句依德立號

第五辟支佛果

辟支佛是畧梵語具云辟支迦羅此翻緣覺下文與此唐梵影畧也言緣覺者觀察

十二因緣而悟道故法華經云為求緣覺者說應十二因緣法此義也或曰因緣

起覺故名緣覺即是觀緣悟道之意亦翻獨覺出無佛世無師自悟故此有麟角部

行之不同避煩不錄

進修五果五向證得五分報身五重身光出現現前五地一般漸教二乘了畢到此緣覺最尊

初三句例前次云現前五地一般在菩薩十地中第六現前地今越為第五位此中

不配初地故已如向說後二句結屬二乘之名

報屬十八梵天此是大乘停半獨覺獨自覺知未可為人師範猶如將鹿拽車獨自牽出三界

初句正明色界四禪總有十八天今云爾者第四禪中具有九天前羅漢位云報屬

十三梵天者自四禪中第一日起至四禪而住正當四界四禪十八天中第十天起

至第十三住也今此本是第四禪中第五天起至第九天而住正當四界四禪中第

十四天起至第十八天住也二處之文並舉末後一天為數故云報屬十八梵天如

此則此位自有五天為報身受用之土言五天者一無煩天二無熱天三善見天四

善現天五色究竟天通名五淨居天也此

是大乘停半者以此十地作大小一分時前五是小乘後五是大乘今當第五位故云爾也獨覺獨自覺知釋名未可為人師範誠勸末後二句喻說虛非駕車之用以表此位權漸二乘方得大乘中路即不堪為人師範且可自度而已

欲作三乘教主直須十地安身暫宿門外草庵莫住化城小果昔日五千退席盡是聲聞緣覺譬如貧窮乞人得少便為豐足恰是眾裏醜獺見佛威德走去不堪受斯大法正是憍慢比丘羣狓生得狐兔鸞鳳產下鴉鵂初二句立理次十句引證並是法華經文

後二句喻明
奉勸後賢高德莫學小器辟支
上句勸下句誠

第六速行地
後四位是菩薩乘即第六七八九之四位也菩薩是畧梵語具云菩提薩埵菩提佛道名也薩埵秦言大心眾生有大心入佛道名菩提薩埵更有多名既異翻不定今用梵音也速行在十地中當第七位今云第六者用彼名而不用其義也在彼約其多劫修行故云速行今則不爾下文自說修行得到此位證得六分報身

六分報身例前位說從初發心加功用行今至有相功用後邊出過世間二乘道故至此真如無相邊際最難得到故云修行得到此位也
棄下聲聞緣覺遠求無上菩提梵語阿毘跋致此云不退道心譬如下水之舟湍流不須

多力習成定慧工夫勢力速如飛去總是修行如此何愁佛法無人初從得意生身今已超遷五位若無魔難干懷十地如觀掌內初四句立理釋名此名有二釋初云遠求無上菩提名遠行地次云不退道心亦名不退地經云菩薩到此地以自所行智慧

力故出過一切二乘之上故云棄下聲聞緣覺次曰遠求無上菩提釋遠行二字與彼本地所釋不同彼約從前說今約次後說也阿鞞跋致是梵語亦云阿惟越致此云不退轉智論云無生忍法即是阿鞞跋致無生忍乃此位之勝進也故特用此以立位名經云譬如有人乘船入海以善巧力不遭水難故下文云譬如下水之舟湍流不須多力此二句約喻習成定慧工夫等是合法後六句舉前况後總是修行如此等是慶幸次四句正述初句指前第一今當第六故云超遷五位也古人云道高

魔盛地位到此非人間可感只恐魔來撈嚴五十種魔為此發也
已出色界禪天見住空無邊處
以無色界四天中空無邊處天為報身受用之地
凡所有相虛妄如今驗在目前如夢幻泡影

電方知佛語無虛水影鏡像迷人三界盡遭吞噉選甚二皇五帝誰怕晉宋齊梁自古英雄征戰後頭屈指高賢早知無我無人爭甚浮名淨利
初六句以教照心總知不實後六句以今驗古徒枉前功

第七不動地
成唯識論云無分別智任運相續相用煩惱不能動故名不動地
此位七分報身已到識無邊處法身空有齊肩報身均攤十地應身變化無窮乃是道人活計

初句能依身次句所依土即四空天之第二也次三句別說三身以此地中具三身故若在華嚴則說十身相作矣末句結屬當人
此位名稱不動引舉楞嚴頌云妙湛總持不動首楞嚴王希有消我億劫顛倒不歷僧祇法身寒山有詩一首吾心有似秋月影現碧潭皎潔世間無物比論教我如何宣說可謂秋江一點依稀大海潮平恍惚冰壺雪竇表裏瑩徹無瑕可憐心地洒然

初句標名次十句引證後五句喻顯引證中初五句引經次五句引詩既引詩而又引經者義理相同故世出世間之法皆如此故引經證中初句舉經次句讚佛次句讚法次句斷障末句悟道所以引此者前說所證三身今舉妙湛總持為證表不妄談也未句據文演義欠一獲字非欠也證悟至此本具法身不必言獲引詩證中初句舉名次即四句詩也既悟至此惟證乃知理圓言偏固難說也喻顯中初四句舉喻第五句合法喻上不動之義佛體不動無有作意如月不降百水不升慈善根力法爾如此亦如鏡像隨形所現鏡且不動可見心地洒然矣

可見心地洒然矣

堪嗟城市喧喧愁見六塵來袞佛賜華海軌
坤爭那迷人不見木虫不知木外井魚不信
井餘區區聲色之中杳杳彘形之內牽羊來
赴市中捕魚已安砧上

初二句世緣妨道次二句佛境難知後六
句喻顯九庸故與愍念

今蒙佛贈三乘頓生極樂國土

有能修此三乘教法必能證此三乘聖果
出欲樊籠入蓮花淨域原其所自皆佛贈
我也

第八善慧地

依真如理體起無碍智用成就微妙四無

碍解善說法故名善慧地

到此八分報身

地地增高故云八分比後欠二已前皆不
及矣

已至二十七天呼為無所有處
無所有處乃第二十七天有本云八字悟

也

喻如大牛之車灌頂法王子位名為受職菩
薩

始入大乘下位也生在佛家名之為兒受
灌頂法王子之職位故下句云名為受職
菩薩

理合說法度人見有六根功德普徧三千大
千眼有八百功德十方普現眼前耳有千二
功德聽聲速徹遐邇鼻有八百功德能饜百
億界香舌有千二功德說法力在舌根身有
八百功德蓮化隱現身中意有千二功德六
根智慧主宰得是六根清淨紹佛說法傳燈

初句按定次下通妨問有何因緣說法度
人答見有六根功德等初二句摠標次十
二句正明六根功德末二句結顯本位六
皆名根者皆有生長義故又皆是竅穴門
戶四大為其體質由此謂之根門
法華第十九品留與法師看詳

法華經法師功德品第十九正說六根功
德故

法華第二十品不輕菩薩化人正法像法滅
後增上慢者橫行不依菩薩正路計著邪法
亂人是時不輕禮拜告邪慢比丘請行十
地正道勿將非法陷人邪慢有大勢力惡口

罵詈不輕不用虛妄授記汝是無智比丘當
是四部惡人不信三乘十地二百億劫地獄
邪慢豈可不聞不輕尚遭打擲况復老身孤
寒甘伏被邪毀辱

初二句摠標次十五句舉經證據聖化尚
然末後四句邪法盛行凡身寧免

第九法雲地
慈陰妙雲覆涅槃海名法雲地
到此九分報身
隨位增微故
上至三界之頂已出二十八天
即非非想天為此報身受用之土出即到

也
以是三界之頂上無隣居故名出也非
是迥然出離也
名為等覺大乘乃是法師正位露地車駕白
牛

等覺有二義一即齊等等於妙覺故二即
等級比於妙覺猶較一等故云約等妙覺

亦名如來雖等而修亦名菩薩今當後義
在華嚴中此名當第十地或合等覺於此
地中今從此說既以後位名妙覺佛乘故
以此位寄等覺也乃是法師正位揀異前
文之辭前云理合說法度人約勝進說也
露地車駕白牛亦是揀異前文之辭前位
云大牛之車乃臨門三車中所許之者有
名無實今云露地牛車乃四衢所授者方
是實果與前牛車黑白有異
西天二十八代佛種似此傳燈箇箇稱呼菩
薩神通比佛一般真是釋迦心印果位照據
分明臨滅上升虛空出現一十八變三昧心
火自焚空中舍利如雨
初五句以人驗法後五句以果驗人言二
十八代者自佛囑迦葉展轉于今以心傳
心歷代不絕乃至菩提達磨自西來東傳
於此土譬如一燈傳百千燈燈燈不絕故
云佛種似此傳燈言佛種者紹隆佛種之
謂也心印即是正法眼藏涅槃妙心之異
名也心心相授如印印物故云心印後五
句中初句摠標後四句證驗若非釋迦心
印親傳安得如此
迦葉結集經藏統屬大乘小乘先了辟支一
半次言十地滿心惟有妙覺同宗果位看他
高下聖說九聽無疑叫喚醉醒修行九說九
聽爭訛轉使眾生眩暈
初二句摠標次四句別釋後四句揀異如
來在世根熟易調一稟尊言無不應契世
尊滅後末世無聞須用結集大小乘藏以
應大小乘機故律中有言過去六佛中四

佛結集經教故佛法久住於世二佛不結集經教故佛法速滅故知佛所說法須用結集也

惟有十地正修其餘那堪屈指三乘久煉成功爭那時流性急人愛易學易成恰似畫餅不能哀哉古道萌生不免編排十地

初四句正顯此宗之要次二句喻明妄集之非後二句因示述作之意

第十妙覺地

此地乃頓教大乘也已前三乘皆漸今稱頓教者即是佛乘十地中本無妙覺地佛意慈悲下接三乘同居十地勸三乘人學

佛故也三乘及佛所以異者謹按藏經修行格式其塑像及畫像等四果羅漢及五果辟支皆是二乘小仙其塑畫形像只依常僧相貌以表小乘人也其菩薩大仙者披瓔珞持環釧頂花冠以表受職法師大仙也今此妙覺一佛乘人頂上旋螺髮項

背焰光智題卍字身黃金色以表功行圓滿故此特立頓教之名也言妙覺者功行既足朗然大悟離覺所覺故云妙覺惟識論云金剛喻定現在前時斷佛地障即入妙覺也是故妙覺名無上士無上士者無所斷故

到此十分報身是名超出三界

上句圓滿報身下句二十八天羅籠不住初以三乘誘引實以佛乘度脫獨此名為頓教向下揔是漸修歡喜離垢發光焰慧難勝現前遠行不動善慧法雲妙覺已終十住十行十向十地十一功圓

此即頓漸分宗佛說一大藏經不出漸頓二字於中則有約機約法約喻不同捨父逃逝照鏡迷頭此約機以明漸頓漸設五時頓無二諦約法以明漸頓登九層之臺斬一線之絲約喻以明漸頓雖然機教相須以喻顯法其實一道也宗途既異故今

分之初二句引經證成次二句已如向說次四句具列地名後二句出此教意問今

文不用初歡喜地何故亦總列耶答非不用也但以歡喜為入道之方便當外九位未預聖流故不數也若無方便安入正乘故復列耳後二句別出頓教佛乘之意故

舉三賢十聖會入華嚴大乘同性經云所有聲聞法辟支佛法菩薩法諸佛法如是一切諸法皆悉流入毘盧遮那智藏大海斯良證也

般若文殊智滿涅槃普賢行成繼紹釋迦種智到此弥勒下生

文殊智普賢行各自表法釋迦則總具上二入大寂定則弥勒當下生矣

善財童子規矩五十知識徧叅今歸善住樓閣盧舍那身在茲

如華嚴說此是善財於我何預若有敬慕心亦當如是學

華嚴藏裏安身極樂國中永壽大寶華王座上自在師子哮吼佛為一大因緣今日悟佛知見已入無餘涅槃降伏群魔外道三身四智已辦八解六通久成無為無相解脫覺海無來無去法身法界齊平心包塵刹刹化出六道四生六合乾坤內外天地是佛子孫

初二句所依土次二句能應身次二句化事畢次二句道力備次六句德相具足後三句功用圓成三身四智八解六通諸佛分上所具之德相業用也法報化三身如前七地說言四智者轉識所成即平等性智妙觀察智成所作智大圓鏡智八解六

通乃華嚴二句經文云獲六神通得八解脫謂之八無學果本來成佛故曰久成

生佛體同故云化出六道或云五道四生即卵胎濕化也今此三界皆是我有其中眾生悉是吾子即知天地是佛子孫矣

畧舉法華作證爾時諸梵天王并及諸天帝釋護世四大天王及大自在天主眷屬百千萬數合掌稽首禮我請我轉正法輪若但講佛大乘眾生沒在於苦不能信是正法破法不肯信故

並是法華經文第十句云眾生沒在於苦有本云沒有一人在苦傳寫之說也

再舉法華作證今此三界我有其中悉是吾子但係有形有名不可與佛比有三界獨稱最尊隱顯聖允慈父

初三句引證後四句隨機

三乘十地說已是為佛法正宗普願法界眾生同入薩婆若海

此是結勸流通正法聖師設教貴在流通普被將來遐益群品

初學記終

初學記

校勘記

一 底本，元普寧藏本。此經僅元普寧藏本收錄，無校。